

杜工部集

二

宋板杜工部集

王原叔

洙

編次本

第貳冊

杜工部集卷第三



前劍南節度叅謀宣義郎檢校尚書工部員外郎賜緋魚袋京兆杜甫

古詩七十八首

貽阮隱居昉一首

遣興三首

昔遊一首

幽人一首

佳人一首

赤谷西崦人家一首

西枝村尋置草堂地夜宿贊公土室二首

杜集三

寄贊上人一首

太平寺泉眼一首

夢李白二首

有懷台州鄭十八司戶虔一首

遣興五首

遣興五首

遣興五首

前出塞九首

後出塞五首

別贊上人一首

萬丈潭一首

兩當縣吳十侍御江上宅一首

發秦州一首

乾元二年自秦州赴同谷縣紀行十二首

赤谷一首

鐵堂峽一首

鹽井一首

寒硤一首

法鏡寺一首

青陽峽一首

龍門鎮一首

杜集三

石龕一首

積草嶺一首

泥功山一首

鳳凰臺一首

乾元中寓居同谷縣作歌七首

發同谷縣一首

木皮嶺一首

白沙渡一首

水回渡一首

一作水會渡

飛仙閣一首

五盤一首

龍門閣一首

石櫃閣一首

桔栢渡一首

劔門一首

鹿頭山一首

成都府一首

貽阮隱居昉

陳留風俗衰人物世不數塞上得阮生迥繼先父祖貧
知靜者性自益毛髮古車馬入隣家蓬蒿翳環堵

杜集三

三

清詩近道要識子用心苦尋我草逕微褰裳踏寒雨
更議居遠林避喧甘猛虎足明箕穎客榮貴如糞土

遣興三首

下馬古戰場四顧但茫然風悲浮雲去黃葉墜我前
朽骨穴螻蟻又為蔓草纏故老行歎息今人尚開邊

漢虜互勝負封疆不常全安得廉恥將三軍同晏眠耻一作頗

高秋登寒一作塞山南望馬邑州降虜東擊胡壯健盡不

留穹廬莽牢落上有行雲愁老弱哭道路願聞甲兵

休鄴中事反覆一云何蕭條死人積如丘諸將已茅土載驅

誰與謀

豐年孰云遲甘澤不在早耕田秋雨足禾黍已映道春
苗九月交顏色同日老勸汝衡門士勿悲尚枯槁時來
展材力先後無醜好但訝鹿皮翁忘機對芳草

一云
荒草

昔遊

昔謁華蓋君深求洞宮脚玉棺已上天白日亦寂寞暮
升艮岑頂巾几猶未却弟子四五人入來淚俱落余
時遊名山發軔在遠壑良覲違夙願舍淒向廖廓
林昏罷幽磬音夜伏石閣王喬下天壇微月映皓鶴
晨溪嚮虛駛歸徑行已昨豈辭青鞋眊悵望金匕藥
東蒙赴舊隱尚憶同志樂休事董先生於今獨蕭索

本集三

四

胡爲客關塞道意久衰薄妻子亦何人丹砂負前諾
雖悲髮變鬢

一云鬢
髮變

未憂筋力弱扶藜望清秋有興
入廬霍

幽人

孤雲亦群遊神物有所歸麟鳳在赤霄何當一來儀
往與惠荀輩中年滄洲期天高無消息弃我忽若遺
內懼非道流幽人見瑕疵洪濤隱語笑鼓枻蓬萊池
崔嵬扶桑日照曜珊瑚枝風帆倚翠蓋暮把東皇衣
嚙漱元和津所思煙霞微知名未足稱局促商山芝
五湖復浩蕩歲暮有餘悲

佳人

絕代有佳人幽居在空山一云谷自云良家子零落依草
木關中昔喪敗兄弟遭殺戮官高何足論不得收骨
肉世情惡衰歇萬事隨轉燭夫婿輕薄兒新人美如
玉合昏尚知時鴛鴦不獨宿但見新人笑那聞舊人
哭在山泉水清出山泉水濁侍婢賣珠迴牽蘿補茅
屋摘花不挿髮一作采栢動盈掬天寒翠袖薄日暮
倚脩竹

赤谷西崦人家

躋險不自喧出郊已清目溪迴日氣暖逕轉山田熟鳥

杜集三

五

雀依茅茨藩籬帶松菊如行武陵暮欲問桃花宿

西枝村尋置草堂地夜宿贊公土室二首

出郭眇細岑披榛得微路溪行一流水曲折方屢渡贊
公湯休徒好靜心迹素昨枉霞上作盛論巖中趣
怡然共携手恣意同遠步捫蘿澁先登陟巘眩反顧
要求陽岡暖苦涉陰嶺互惆悵老大藤沈吟屈蟠樹
卜居意未展杖策迴且暮曾巔餘落日草蔓已多露
天寒鳥已歸月出人更一作靜土室延白光松門耿踈
影躋攀倦日短語樂寄夜永明燃林中新暗汲石底
一作泉井大師京國舊德業天機秉從來支許遊興趣

江湖迫數竒謫關塞道廣存箕頴何知戎馬間復接
塵事屏幽尋豈一路遠色有諸嶺晨光稍矇矓更越
西南頂

寄贄上人

一昨陪錫杖卜隣南山幽年侵腰脚衰未便陰崖秋
重岡北面起竟日陽光留茅屋買兼土斯焉心所求
近聞西枝西有谷杉_{一作漆}稠亭午頗和暖石田又足
收當期塞雨乾宿昔齒疾瘳徘徊虎穴上面勢龍
泓頭柴荆具茶茗逕路通林丘與子成二老來往亦
風流

杜集三

六

太平寺泉眼

招提憑高岡踈散連草莽出泉枯柳根汲引歲月古
石間見海眼天畔縈水府廣深尺丈間宴息敢輕侮
青白二小虵幽姿可時覩如絲氣或上爛漫爲雲雨
山頭到山下鑿釜井不盡土取供十方僧香美勝牛乳
北風起寒文弱藻舒翠縷明涵客衣淨細蕩林影趣
何當宅下流餘潤通藥圃三春濕黃精一食生毛羽

夢李白二首

死別已吞聲生別常惻惻江南瘴癘地逐客無消息
故人入我夢明我長相憶恐非平生魂路遠不可測

魂來楓林青魂返關塞黑今君在羅網何以有羽翼
落月滿屋梁猶疑照顏色水深波浪闊無使蛟龍得
浮雲終日行遊子久不至三夜頻夢君情親見君意
告歸常局促苦道來不易江湖多風波一去秋多風舟楫恐失墜
出門搔白首若負平生志冠蓋滿京華斯人獨顛顛
孰云網恢恢將老身反累千秋萬歲名寂寞身後事

有懷台州鄭十八司戶虔

天台隔三江一云江海風浪無晨暮鄭公縱得歸老病不識
路昔如水上鷗今如罫中兔性命由他人悲辛但狂
顧山鬼獨一脚蝮虵長如樹呼號旁孤城歲月誰與

杜集三

七

度從來禦魑魅多為才名悞夫子嵇阮流更被時俗
惡海隅微小吏眼暗髮垂素黃帽映一云鳩杜近青袍非
供折甬具平生一杯酒見我故人遇相望無所成乾
坤莽迴互

遣興五首

蟄龍三冬卧老鶴萬里心昔時賢俊人未遇猶視今
嵇康不得死一云且不死孔明有知音又如壠底松用捨在
所尋大哉霜雪幹歲久為枯林

昔者龐德公未曾入州府襄陽耆舊間處士節獨苦
豈無濟時策一作術終竟畏羅罟一云終歲畏罪罟林茂鳥有歸水

深魚知聚舉家隱鹿門劉表焉得取

我今日夜憂諸弟各異方不知死與生何況道路長
避寇一分散飢寒永相望豈無柴門歸欲出畏虎狼
仰看雲中鴈禽鳥亦有行

蓬生非無根漂蕩隨高風天寒落萬里不復歸本叢
客子念故宅三年門巷空悵望但烽火戎車滿關東
生涯能幾何常在羈旅中

昔在洛陽時親友相追攀送客東郊道遨遊宿南山
煙塵阻長河樹羽成臯間迴首載酒地豈無一日還
丈夫貴壯健慘戚非朱顏

杜集三

遣興五首

朔風飄胡鴈慘澹帶砂礫長林何蕭蕭秋草萋更碧
北里富薰天高樓夜吹笛焉知南隣客九月猶絺綌
長陵銳頭兒出獵待明發駢弓金爪鏑白馬蹴微雪
未知所馳逐但見暮光滅歸來懸兩狼門戶有旌節
漆有用而割膏以明自煎蘭摧白露下桂折秋風前
府中羅舊尹沙道尚依然赫赫蕭京兆今爲時所憐
猛虎憑其威往往遭急縛雷吼徒咆哮枝撐已在脚
忽看皮寢處無復情閃爍人有甚於斯足以勸元惡
朝逢富家葬前後皆輝光共指親戚大總麻百夫行

送者各有死不須羨其強君看束練去亦得歸山岡
遣興五首

天用莫如龍有時繫扶桑頓轡海徒涌神人身更長
性命苟不存英雄徒自強吞聲勿復道真宰意茫茫
地用莫如馬無良復誰記此日千里鳴追風可君意
君看渥洼種態與駑駘異不雜蹄齧閒逍遙有能事
陶潛避俗翁未必能達道觀其著詩集頗亦恨枯槁
達生豈是足默識蓋不早有子賢與愚何其掛懷抱
賀公雅吳語在位常清狂上疏乞骸骨黃冠歸故鄉
爽氣不可致斯人今則亡山陰一茅宇江海日淒涼

吾憐孟浩然短褐即長夜賦詩何必多往往凌鮑謝
清江空舊魚春雨餘甘蔗每望東南雲令人幾悲叱

前出塞九首

戚戚去故里悠悠赴交河公家有程期亡命嬰禍羅
君已富土壤開邊一何多弃絕父母恩吞聲行負戈
出門日已遠不受徒旅欺骨肉恩豈斷男兒死無時
走馬脫轡頭手中挑青絲捷下萬仞岡俯身試塞旗
磨刀鳴咽水水赤刃傷手欲輕腸斷聲心緒亂已久
丈夫誓許國憤惋復何有功名圖騏驎戰骨當速朽
送徒既有長遠戍亦有身生死向前去不勞吏怒嗔

路逢相識人附書與六親哀哉兩決絕不復同苦辛
迢迢萬餘里領我赴三軍軍中異苦樂主將寧盡聞
隔河見胡騎倏忽數百群我始爲奴僕幾時樹功勳
挽弓當挽強用箭當用長射人先射馬擒寇先擒王
殺人亦有限列國自有疆苟能制侵陵豈在多殺傷
驅馬天雨雪軍行入高山逕危抱寒石拍落曾冰間
已去漢月遠何時築城還浮雲暮南征可望不可攀
單于寇我壘百里風塵昏雄劍四五動彼軍爲我奔
虜其名王歸繫頸授轅門潛身備行列一勝何足論
從軍十年餘能無分寸功衆人貴苟得欲語羞雷同

杜集三

十

中原有鬪爭況在狄與戎丈夫四方志安可辭固窮

後出塞五首

男兒生世間及壯當封侯戰伐有功業焉能守舊丘
召募赴薊門軍動不可留千金買馬鞭一作鞍 百金裝刀
頭閭里送我行親戚擁道周班白居易上列酒酣進庶
羞少年別有贈含笑看吳鉤

朝進東門營暮上河陽橋落日照大旗馬鳴風蕭蕭
平沙列萬幕部伍各見招中天懸明月令嚴夜寂寥
悲笳數聲動壯士慘不驕借問大將誰恐是霍嫖姚
古人重守邊今人重高勳豈知英雄主出師亘長雲

六合已一家四夷且孤軍遂使貔虎士奮身勇所聞拔
劍擊大荒日收胡馬群誓開玄冥北持以奉吾君

獻凱日繼踵兩蕃靜無虞漁陽豪俠地擊鼓吹笙竽
雲帆轉遼海粳稻來東吳越羅與楚練照耀輿臺軀
主將位益崇氣驕凌上都邊人不敢議議者死路衢

我本良家子出師亦多門將驕益愁思身貴不足論
躍馬二十年恐辜明主恩坐見幽州騎長驅河洛昏
中夜聞道歸故里但空村惡名幸脫免窮老無兒孫

別贊上人

百川日東流客去亦不息我生苦漂蕩何時有終極

杜集三

十一

贊公釋門老放逐來上國還爲世塵嬰頗帶憔悴色
楊枝晨在手豆子兩已熟是身如浮雲安可限南北
異縣逢舊友初忻寫曾臆天長關塞寒歲暮飢凍逼
一云天長關塞遠歲暮飢寒逼野風吹征衣欲別向曛黑馬嘶一作鳴思故
樞歸鳥盡斂翼古來聚散地宿昔長荆棘相看俱衰
年出處各努力

萬丈潭 同谷縣作

青溪合冥寞神物有顯晦龍依積水蟠窟壓萬丈內
跼步凌垠堦側身下煙靄前臨洪濤寬却立蒼石大
山危一徑盡岸絕兩壁對削成根虛無倒影垂澹瀨

黑如灣環底清見光炯碎孤雲到來深飛鳥不在外
高蘿成帷幄寒木疊旌旆遠川曲通流嵌竇潛洩瀨
造幽無人境發興自我輩告歸遺恨多將老斯遊最
閉藏修鱗蟄出入巨石礙何事炎天過快意風雨會
兩當縣吳十侍御江上宅

寒城朝煙澹山谷落葉赤陰風千里來吹汝江上宅
鷓鴣號枉渚日色傍阡陌借問持斧翁幾年長沙客
哀哀失木狖矯矯避弓翻亦知故鄉樂未敢思宿昔
昔在鳳翔都共通金閨籍天子猶蒙塵東郊暗長戟
兵家忌間謀此輩常接跡臺中領舉劾君必慎剖析

不忍殺無辜所以分黑白上官權許與失意見遷斥
仲尼甘旅人向子識損益朝廷非不知閉口休歎息
余時忝諍臣丹陛實咫尺相看受狼狽至死難塞責
行邁心多違出門無與適於公負明義惆悵頭更白

發秦州

乾元二年自秦州赴
同谷縣紀行十二首

我衰更嬾拙生事不自謀無食問樂土無衣思南州
漢源十月交天氣如涼秋草木未黃落况聞山水幽
栗亭名更嘉下有良田疇充腸多薯蕷崖蜜亦易求
密竹復冬筍清池可方舟雖傷旅寓遠庶遂平生遊
此邦俯要衝實恐人事稠應接非本性登臨未銷憂

谿谷無異石塞田始微收豈復慰老夫惘然難久留
日色隱孤戍烏啼滿城頭中霄驅車去飲馬寒塘流
磊落星月高蒼茫雲霧浮大哉乾坤內吾道長悠悠

赤谷

天寒霜雪繁遊子有所之豈但歲月暮重來未有期
晨發赤谷亭險艱方自茲亂石無改轍我車已載脂
山深苦多風落日童稚飢悄然村墟迥煙火何由追
貧病轉零落故鄉不可思常恐死道路永爲高人嗤

鐵堂峽

山風吹遊子縹緲乘險絕硤形藏堂隍壁色立積鐵

徑摩穹蒼蟠石與厚地裂脩纖無垠竹嵌空太始雪
威遲哀壑底徒旅慘不悅水寒長冰橫我馬骨正折
生涯抵弧矢盜賊殊未滅飄蓬踰三年迴首肝肺熱

鹽井

鹵中草木白青者官鹽煙官作既有程煮鹽煙在川
汲井歲擘擘出車日連連自公斗三百轉致斛六千
君子慎止足小人苦喧闐我何良歎嗟物理固自然

寒硤

行邁日悄悄山谷勢多端雲門轉絕岸積阻霾天寒
寒硤不可度我實衣裳單況當仲冬交泝泐增波瀾

野人尋煙語行子傍水食此生免荷及未敢辭路難
法鏡寺

身危適他州勉強終勞苦神傷山行深愁破崖寺古
嬋娟碧鮮淨蕭撼寒籜聚回回山一作石根水冉冉松上
雨洩雲蒙清晨初日翳復吐朱甍半光炯戶牖粲可
數拄策忘前期出蘿已亭午冥冥子規叫微徑不復取

青陽峽

塞外苦馱山南行道彌惡岡巒相經亘雲水氣參錯
林迴硤角來天窄一作窄壁面削溪西五里石奮怒向我
落仰看日車側俯恐坤軸弱魑魅嘯有風霜霰浩漠漠

杜集三

十四

昨憶踰壠坂高秋視吳岳東笑蓮花卑北知崆峒薄
超然侔壯觀已謂殷寥廓突兀猶趁人及茲歎冥寞

龍門鎮

細泉兼輕冰沮洳棧道濕不辭辛苦行迫此短景急
石門雲雲隘古鎮峯巒集旌竿暮慘澹風水白刃澁
胡馬屯成臯防虞此何及嗟爾遠戍人山寒夜中泣

石龕

熊羆咆我東虎豹號我西我後鬼長嘯我前狨又啼
天寒昏無日山遠道路迷驅車石龕下仲冬見虹蜺
伐竹者誰子悲謔上一云抱雲梯爲官采美箭五歲供梁齊

苦云直斡盡無以充提携
奈何漁陽騎颯颯驚蒸黎
積草嶺

連峯積長陰白日遞隱見
颯颯林響交慘慘石狀變
山分積草嶺路異明水縣
旅泊吾道窮衰年歲時倦
卜居尚百里休駕投諸彦
邑有佳主人情如已會面
來書語絕妙遠客驚深眷
食蕨不願餘茅茨眼中見

泥功山

朝行青泥上暮在青泥中
泥濘非一時版築勞人功
不畏道途永乃將汨沒同
白馬爲鐵驪小兒成老翁
哀猿透却墜死鹿力所窮
寄語北來人後來莫怱怱

杜集三

十五

鳳凰臺

山峻不
至高頂

亭亭鳳凰臺北對西康州
西伯今寂寞鳳聲亦悠悠
山峻路絕蹤石林氣高浮
安得萬丈梯爲君上上頭
恐有無母雛飢寒日啾啾
我能剖心出飲啄慰孤愁
心以當竹實炯然忘外求
血以當醴泉豈徒比清流
所重王者瑞敢辭微命休
坐看綵翮長舉意八極周
自天銜瑞圖飛下十二樓
圖以奉至尊鳳以垂鴻猷
再光中興業一洗蒼生憂
深衷正爲此羣盜何淹留

乾元中寓居同谷縣作歌七首

有客有客字子美白頭亂髮垂過耳
歲拾橡栗隨狙

公天寒日暮山谷裏中原無書歸不得手脚凍皴皮
肉死嗚呼一哥兮哥已哀悲風爲我從天來

長鏡長鏡白木柄我生託子以爲命黃精一作獨無苗山

雪盛短衣數挽不掩脛此時與子空一作同歸來男呻女

吟四壁靜嗚呼二哥兮哥始放鄰里爲我色惆悵

有弟有弟在遠方三人各瘦何人強生別展轉不相

見胡塵暗天道路長東飛鴛鴦後鵝鶻安得送我置

汝傍嗚呼三哥兮哥三發汝歸何處收兄骨

有妹有妹在鍾離良人早歿諸孤癡長淮浪高蛟龍

怒十年不見來何時扁舟欲往箭滿眼杳杳南國多

杜集三

十六

旌旗嗚呼四哥兮哥四奏林猿爲我啼清晝

四山多風溪水急寒雨颯颯枯樹濕一云樹枝濕黃蒿古城

雲不開白狐跳梁黃狐立我生胡爲在窮谷中夜起

坐萬感集嗚呼五哥兮哥正長魂招不來歸故鄉

南有龍兮在山湫古木巖從枝相樛木葉黃落龍正

蟄蝮虵東來水上遊我行怪此安敢出拔劍欲斬且

復休嗚呼六哥兮哥思遲溪壑爲我迴春姿

男兒生不成名身已老三年飢走荒山道長安卿相

多少年富貴應須致身早山中儒生舊相識但話宿

昔傷懷抱嗚呼七哥兮哥終曲仰視皇天白日速

發同谷縣

乾元二年十二月一日
自隴右赴劔南紀行

賢有不黔突聖有不暖席況我飢愚人焉能尚安宅
始來茲山中休駕喜地僻奈何迫物累一歲四行役
忡忡去絕境杳杳更遠適停驂龍潭雲回首白崖一作虎崖
石臨岐別數子握手淚再滴交情無舊深窮老多慘
感平生嬾拙意偶值棲遁跡去住與願違仰慙林閒翮

木皮嶺

首路栗亭西尚想鳳皇村季冬携童一作幼稚辛苦赴蜀
門南登木皮嶺艱險不易論汗流被我體祁寒爲之
暄遠岫爭輔佐千巖自崩奔始知五岳外別有他山

杜集三

十七

尊仰干一作看塞大明俯入裂厚坤再聞虎豹鬪屢跼風
水昏高有廢閣道摧折如短一云斷轅下有冬青林石上
走長根西崖特秀發煥若靈芝繁潤聚金碧氣清無
沙土痕憶觀崑崙圖目擊玄圃存對此欲何適默傷
垂老魂

白沙渡

畏途隨長江渡口下絕岸差池上舟楫杳窅入雲漢
天寒荒野外日暮中流半我馬向北嘶山猿飲相喚
水清石礪礪沙白灘漫漫迴然洗愁辛多病一踈散
高壁抵嶽崆洪濤越凌亂臨風獨迴首攬轡復三歎

水會渡

一去水回渡

山行有常程中夜尚未安微月沒已久崖傾路何難
大江動我前洶若溟渤寬篙師暗理楫訝嘯輕波瀾
霜濃木石滑風急一作列手足寒入舟已千夏陟巘仍萬盤
迴眺積水外始知衆星乾遠遊令人瘦衰疾慙加餐

飛仙閣

土

一作出

門山行窄微徑緣秋毫

一去徑微上秋毫

棧雲闌干峻

梯石結構牢萬壑歆踈林

竹一云

積陰帶奔濤寒日外

淡泊長風中怒號歇鞍在地底始覺所歷高往來雜
坐卧人馬同疲勞浮生有定分飢飽豈可逃歎息謂

杜集三

十八

妻子我何隨汝曹

五盤

五盤雖云險山色佳有餘仰凌棧道細俯映江木踈
地僻無罟網水清反多魚好鳥不妄飛野人半巢居
喜見淳朴俗坦然心神舒東郊尚格鬪巨猾何時除
故鄉有弟妹流落隨丘墟成都萬事好豈若歸吾廬

龍門閣

清江下龍門絕壁無尺土長風駕高浪浩浩自太古
危途中縈盤仰望垂線縷滑石歆誰鑿浮梁裊相拄
目眩墮雜花頭風吹過雨百年不敢料一墜那得取

飽聞經瞿塘足見度大庾終身歷艱險恐懼從此數

石櫃閣

季冬日已長山晚半天赤蜀道多早花江間饒竒石
石櫃曾波上臨虛蕩高壁清暉迴群鷗暝色帶遠客
羈栖負幽意感歎向絕跡信甘孱懦嬰不獨凍餒迫
優游謝康樂放浪陶彭澤吾衰未自由謝爾性有適

桔柏渡

青冥寒江渡駕竹爲長橋竿濕煙漠漠江永風蕭蕭
連竿動嫋娜征衣颯飄飄急流鴉鷁散絕岸鼉鼉驕
西轅自茲異東逝不可要高通荆門路闊會滄海潮

杜集三

十九

孤光隱顧眄遊子悵寂寥無以洗心胷前登但山椒

劔門

惟天有設險劔門天下壯連山抱西南石角皆北向
兩崖崇墉倚刻畫城郭狀一夫怒臨關百萬未可傍
珠玉走中原岷峨氣悽愴三皇五帝前雞犬各相放
後王尚柔遠職貢道已喪至今英雄人高視見霸王
并吞與割據極力不相讓吾將罪真宰意欲鏟疊嶂
恐此復偶然臨風默惆悵

鹿頭山

鹿頭何亭亭是日慰飢渴連山西南斷俯見千里豁

遊子出京華，劔門不可越。及茲阻險盡，始喜原野闊。
殊方昔三分，霸氣曾間發。天下今一家，雲端失雙闕。
悠然想揚馬，繼起名碑兀。有文令人傷，何處埋爾骨。
紆餘脂膏地，慘澹豪俠窟。杖鉞非老臣，宣風豈專達。
冀公柱石姿，論道邦國活。斯人亦何幸，公鎮踰歲月。
僕射裴冀公冕

成都府

翳翳桑榆日照我，征衣裳我行山川異。忽在天一方，
但逢新人民未卜。見故鄉大江東流去，遊子去日長。
曾城填華屋，季冬樹木蒼。喧然名都會，吹簫聞笙篁。

杜集三

二十

信美無與適，側身望川梁。鳥雀夜各歸，中原杳茫茫。
初月出不高，衆星尚爭光。自古有羈旅，我何苦哀傷。

杜工部集卷第三

杜工部集卷第四

前劔南節度叅謀宣義郎檢校尚書工部員外郎賜緋魚袋京兆杜甫

古詩三十六首

石笋行一首

石犀行一首

杜鵑行一首

戲作花卿詩一首

贈蜀僧閻丘師兄一首

泛溪一首

壁畫馬歌一首

杜集四

戲題畫山水圖歌一首

題李尊師松樹障子歌一首

古栢行一首

戲爲雙松圖歌一首

喜雨一首

太子張舍人遺織成褥段一首

丈人山一首

百憂集行一首

投簡成華兩縣諸子一首

徐卿二子歌一首

病栢一首

病橘一首

枯椶一首

枯枿一首

憶昔二首

冬狩行一首

韋諷錄事宅觀曹將軍畫馬圖一首

送韋諷上閩州錄事叅軍一首

陪章留後惠義寺餞嘉州崔都督赴州一首

閩州東樓筵奉送十一舅往青城縣一首

杜集四

將適吳楚留別章使君留後兼幕府諸公一首

椶拂子一首

丹青引一首

桃竹杖引一首

寄江外草堂一首

述古三首

石筍行

君不見益州城西門陌上石筍雙高蹲古來一云老相傳是

海眼苔蘚蝕盡波濤痕雨多往往得瑟瑟此事恍惚

難明論恐是昔時卿相墓立石為表今仍存惜哉俗

態好蒙蔽亦如小臣媚至尊政化錯迕失大體坐看
傾危受厚恩嗟爾石筍擅虛名後來未識猶駿奔安
得壯士擲天外使人不疑見本根

石犀行

君不見秦時蜀太守刻石立作三犀牛自古雖有厭
勝法天生江水向一云須東流蜀人矜誇一千載泛溢不
近張儀樓今年灌口損戶口此事或恐爲神羞終藉
隄防出衆力高擁木石當清秋先生作法皆正道詭
怪何得參人謀嗟爾三犀不經濟缺訛只與長川逝
但見元氣常調和自免洪濤恣彫瘵安得壯士提天

杜集四

三

綱再平水土犀奔茫

後漢書戶口減如毛米

杜鵑行

君不見昔日蜀天子化作杜鵑似老烏寄巢生子不
自啄羣鳥至今與哺鷦雖同君臣有舊禮骨肉滿眼
身羈孤業工竄伏深樹裏四月五月偏號呼其聲哀
痛口流血所訴何事常區區爾豈摧殘始發憤羞帶
羽翮傷形愚蒼天變化誰料得萬事反覆何所無萬
事反覆何所無豈憶當殿群臣趨

戲作花卿詩

成都猛將有花卿學語小兒知姓名用如快鷲風火

生見賊惟多身始輕綿州副使着柘黃我卿掃除即日
平子璋髑髏血模糊手提擲還崔大夫李侯重有此
此節度人道我卿絕世一作代無既稱絕世無天子何不
喚取守京都

贈蜀僧問丘師兄

大師銅梁秀籍籍名家孫嗚呼先博士炳靈精氣奔
惟昔武皇后臨軒御乾坤多士盡儒冠墨客藹雲屯
當時上紫殿不獨卿相尊世傳問丘筆峻極逾崑崙
鳳藏丹霄暮龍去白水渾青熒雪嶺東碑碣舊製
存斯文散都邑高價越璵璠晚看作者意妙絕與

杜集四

四

誰論吾祖詩冠古同年蒙主恩豫章夾日月歲久空深
根小子思踈闊豈能達詞門窮愁一揮淚相遇即諸
昆我住錦宮城兄居祇樹園地近慰旅愁往來當
丘樊天涯歇滯雨粳稻卧不翻漂然薄遊倦始與
道旅敦旅一作侶景晏步脩廊而無車馬喧夜闌接軟
語落月如金盆漠漠世界黑驅驅爭奪繁惟有
摩尼珠可照濁水源

泛溪

落景下高堂進舟泛迴溪誰謂築居小未盡喬木西
遠郊信荒僻秋色有餘淒練練峯上雪纖纖雲表霓

童戲左右岸

一云兒童戲左右

罟弋畢提携翻倒荷芟亂指揮

逕路迷得魚已割鱗採藕不洗泥人情逐鮮美物賤

事已

一云迹

睽吾村靄暝姿異舍雞亦棲蕭條欲何適出

處庶可齊衣上見新月霜中登故畦濁醪自初熟東

城多鼓鼙

題壁畫馬歌

韋偃畫

韋侯別我有所適知我憐君

一作渠

畫無敵戲拈秃筆

掃驊騮欵見騏驎出東壁一匹齧草一匹嘶坐看千里

當霜蹄時危安得真致此與人同生亦同死

戲題畫山水圖歌

王宰畫宰丹青絕倫

杜集四

五

十日畫一水五日畫一石能事不受相促迫王宰始

肯留真跡壯哉崑崙方壺

一云文

圖挂君高堂之素壁巴

陵洞庭日本東赤岸水與銀河通中有雲氣隨飛龍

舟人漁子入浦溆山木盡亞

一作帶

洪濤風尤工遠勢古

莫比咫尺應須論

一作干

萬里焉得并州快剪刀剪取吳

松半江水

題李尊師松樹障子歌

老夫清晨梳白頭玄都道士來相訪握髮呼兒延入

戶手提新畫青松障障子松林靜杳冥憑軒忽若無

丹青陰崖却承霜雪幹偃蓋反走虬龍形老夫平生

好奇古對此興與精靈聚已知仙客意相親更覺良
工心獨苦松下丈人中屨同偶坐似是商山翁悵望
聊誇紫芝曲時危慘淡來悲風

古栢行

孔明廟前有老栢柯如青銅根如石霜皮溜雨四十
圍黛色參天二千尺君臣已與時際會樹木猶爲人
愛惜雲來氣接巫峽長月出寒通雪山白憶昨路繞
錦亭東先主武侯同閔宮崔嵬枝幹郊原古窈窕丹
青戶牖空落落盤踞雖得地冥冥孤高多烈風扶持
自是神明力正直元因造化功大厦如傾要梁棟萬
牛回首丘山重不露文章世已驚未辭剪伐誰能送
苦心豈免容螻蟻香葉終經宿鸞鳳志士幽人莫怨
嗟古來材大難爲用

戲爲雙松圖歌 韋偃

天下幾人畫古松畢宏已老韋偃少絕筆長風起纖
末滿堂動色嗟神妙兩株慘裂苔蘚皮屈鐵交錯迴
高枝白摧朽骨龍虎死黑入太陰雷雨垂松根胡僧
憇寂寞厖眉皓首無住著偏袒右肩露雙腳葉裏松
子僧前落韋侯韋侯數相見我有一匹好東一云素絹重
之不減錦繡段已令拂拭光凌亂請公放筆爲直幹

喜雨

春旱天地昏日色赤如血農事都已休兵戈况騷屑
巴人困軍須慟哭厚土熱滄江夜來雨真宰罪一雪
穀根小蘇息沴氣終不滅何由見寧歲解我憂思結
崢嶸群山雲交會未斷絕安得鞭雷公滂沱洗吳越

時聞浙右
多盜賊

太子張舍人遺織成褥段

客從西北來遺我翠織成開緘風濤湧中有掉尾鯨
逶迤羅水族瑣細不足名客云充君褥承君終宴榮
空堂魑魅走高枕形神清領客珍重意顧我非公卿

杜集四

七

留之懼不祥施之混柴荆服飾定尊卑大哉萬古程
今我一賤老裋褐更無營煌煌珠宮物寢處禍所嬰
歎息當路子干戈尚縱橫掌握有權柄衣馬自肥輕
李鼎死歧陽實以驕貴盈來瑱賜自盡氣豪直阻兵
皆聞黃金多坐見悔吝生奈何田舍翁受此厚貺情
錦鯨卷還客始覺心和平振我麤麤席塵媿客茹藜羹

丈人山

自為青城客不唾青城地為愛丈人山丹梯近幽意
丈人祠西佳氣濃綠雲擬住最高峯掃除白髮黃精
在君看他時冰雪容

百憂集行

憶年十五心尚孩健如黃犢走復來庭前八月梨棗
熟一日上樹能千迴即今倏忽已五十坐卧只多少
行立強將笑語供主人悲見生涯百憂集入門依舊
四壁空老妻覩我顏色同癡兒未知父子禮叫怒索
飯啼門東

投簡成華兩縣諸子

赤縣官曹擁材傑軟裘快馬當冰雪長安苦寒誰獨
悲杜陵野老骨欲折南山豆苗早荒穢青門瓜地新
凍裂鄉里兒童項領成朝廷故舊禮數絕自然棄擲
與時異況乃踈頑臨事拙飢卧動即向一旬弊衣何
啻聯百結君不見空墻日色晚此老無聲淚垂血

徐卿二子歌

君不見徐卿二子生絕竒感應吉夢相追隨孔子釋
氏親抱送並是天上麒麟兒大兒九齡色清澈秋水
為神王為骨小兒五歲氣食牛滿堂賓客皆回頭吾
知徐公百不憂積善衮衮生公侯丈夫生兒有如此
二鷁者名位豈肯卑微休

病栢

有栢生崇岡童童狀車一云青蓋偃蹇感龍虎姿主當風雲

會神明依正直故老多再拜豈知千年根中路顏色
壞出非不得地蟠據亦高大歲寒忽無憑日夜柯葉
改丹鳳領九鷄哀鳴翔其外鳴鴉志意滿養子穿穴
內客從何鄉來佇立久吁怪靜求元精理浩蕩難倚賴

病橘

羣

伊云

橘少生意雖多亦奚為惜哉結實小酸澁如棠

梨剖之盡蠹蟲采掇爽其宜紛然不適口豈只存其
皮蕭蕭半死葉未忍別故枝玄冬霜雪積況乃迴風
吹嘗聞蓬萊殿羅列瀟湘姿此物歲不稔玉食失少云
光輝寇盜尚憑陵當君減膳時汝病是天意吾諗愁云

杜集四

九

罪有司憶昔南海使奔騰獻荔支百馬死山谷到今
耆舊曰悲

枯椶

蜀門多椶

椶云

椶高者十八九其皮割剝甚雖衆亦易

朽徒布如雲葉青黃歲寒後交橫集斧斤凋喪先蒲
柳傷時苦軍乏一物官盡取嗟爾江漢人生成復何有
有同枯椶木使我況嘆夕死者即已休生者何自守
啾啾黃雀啁側見寒蓬走念爾形影乾摧殘沒藜莠

枯枿

梗枿枯崢嶸鄉黨皆莫記不知幾百歲慘慘無生意

上枝摩皇天下根蟠厚地巨圍雷霆圻萬孔蟲蟻萃
凍雨落流膠衝風奪佳氣白鵠遂不來天鷄為愁思
猶含棟梁具無復霄漢志良工古昔少識者出涕淚
種榆水中央成長何容易截承金露盤裊裊不自畏

憶昔二首

憶昔先皇巡朔方千乘萬騎入咸陽陰山驕子汗血
馬長驅東胡胡走藏鄴城反覆不足怪關中小兒壞
紀綱張后不樂上為忙至今今上猶撥亂勞身焦思
補四方我昔近侍叨奉引出兵整肅不可當為留猛
士守未央致使岐雍防西羌犬戎直來坐御牀百官

杜集四

十

跣足隨天王願見北地傅介子老儒不用尚書郎

憶昔開元全盛日小邑猶藏萬家室稻米流脂粟米
白公私倉廩俱豐實九州道路無豺虎遠行不勞吉
日出齊紈魯縞車班班男耕女桑不相失宮中聖人
奏雲門天下朋友皆膠漆百餘年間未災變叔孫禮
樂蕭何律豈聞一綃直萬錢有田種穀今流血洛陽
宮殿燒焚盡宗廟新除狐兔穴傷心不忍問耆舊復
恐初從亂離說小臣魯鈍無所能朝廷記識蒙祿秩
周宣中興望我皇灑血江漢長身一云衰疾

冬狩行

時梓州刺史章彝兼
侍御史留後東川

君不見東川節度兵馬雄校獵亦似觀成功夜發猛
士三千人清晨合圍步驟同禽獸已斃十七八殺聲
落日迴蒼穹幕前生致九青兕駝駝嵒危垂玄熊東
西南北百里間髣髴蹴踏寒山空有鳥名鸚鵡力不
能高飛逐走蓬肉味不足登鼎俎胡為見羈虞羅中
春蒐冬狩侯得同使君五馬一馬驄況今攝行大將
權號令頗有前賢風飄然時危一老翁十年厭見旌
旗紅喜君士卒甚整肅為我迴轡擒西戎草中狐兔
盡何益天子不在咸陽宮朝廷雖無幽王禍得不哀
痛塵再蒙嗚呼得不哀痛塵再蒙

杜集四

十一

韋諷錄事宅觀曹將軍畫馬圖

國初已來畫鞍馬神妙獨數江都王將軍得名三十
載人間又見真乘黃曾先帝照夜白龍池十日飛
霹靂內府殷紅馬腦盤婕妤傳詔才人索盃賜將軍
拜舞歸輕紈細綺相追飛貴戚權門得筆跡始覺屏
障生光輝昔日太宗拳毛騮近時郭家師子花今之
新圖有二馬復令識者久嘆嗟此皆騎戰一敵萬縞
素漠漠開風沙其餘七匹亦殊絕迥若寒空動煙雪
霜蹄蹴踏長楸間馬官廝養森成列可憐九馬爭神
駿顧視清高氣深穩借問苦心愛者誰後有韋諷前

支遁憶昔巡幸新豐宮翠華拂天來向東騰驤磊落
三萬匹皆與此圖筋骨同自從獻寶朝河宗無復射
蛟江水中君不見金粟堆前松柏裏龍媒去盡鳥呼風
送韋諷上閩州錄事參軍

國步猶艱難兵革未衰息萬方哀嗷嗷十載供軍食
庶官務割剝不暇憂反側誅求何多門賢者貴為德

一云賢俊
愧為力

韋生富春秋洞澈有清識操持紀綱地喜見

朱絲直當令豪奪吏自此無顏色必若救瘡痍先應
去蝥賊揮淚臨大江高天意悽惻行行樹佳政慰我
深相憶

陪章留後惠義寺餞嘉州崔都督赴州

中軍待上客令肅事有恒前驅入寶地祖帳飄金繩

南陌

一云伯

既留歡茲山亦深登清聞樹杪磬遠謁雲端

僧迴策匪新岸所攀仍舊藤耳激洞門颯目存寒谷
冰出塵悶軌躅畢景遺炎蒸永願坐長夏將衰棲大
乘羈旅惜宴會艱難懷友朋勞生共幾何離恨兼相仍

閩州東樓筵奉送十一舅往青城縣得昏字

曾城有高樓制古丹牖存迢迢百餘尺豁達開四門
雖有車馬客而無人世喧遊目俯大江列筵慰別魂
是時秋冬交節往顏色昏天寒鳥獸休霜露在草根

今我送舅氏萬感集清罇豈伊山川間迴首盜賊繁
高賢意不暇王命久崩奔臨風欲慟哭聲出已復吞
將適吳楚留別章使君留後兼幕府諸公得柳字
我來入蜀門歲月亦已久豈唯長兒童自覺成老醜
常恐性坦率失身為杯酒近辭痛飲徒折節萬夫後
昔如縱壑魚今如喪家狗既無遊方戀行止復何有
相逢半新故取別隨薄厚不意青草湖扁舟落吾手
眷眷章梓州開筵俯高柳樓前出騎馬帳下羅賓友健
兒歎紅旗此樂或難朽日車隱崑崙鳥雀噪戶牖波
濤未足慰三峽徒雷吼所憂盜賊多重見衣冠走中
原消息斷黃屋今安否終作適荆蠻安排用莊叟隨
雲拜東皇挂席上南斗有使即寄書無使長迴首

櫻拂子

櫻拂且薄陋豈知身效能不堪代白羽有足除蒼蠅
熒熒金錯刀擢擢朱絲繩非獨顏色好亦用顧眄稱
吾老抱疾病家貧卧炎蒸咂膚倦撲滅賴爾甘服膺
物微世競弃義在誰肯徵三歲清秋至未敢闕緘滕

丹青引

贈曹將軍霸

將軍魏武之子孫於今為庶為清門英雄割據雖已
矣文彩風流今尚存學書初學衛夫人但恨無過王

右軍丹青不知老將至富貴於我如浮雲開元之中
常引見承恩數上南薰殿凌煙功臣少顏色將軍下
筆開生面良相頭上進賢冠猛將鬚間大羽箭褒公
鄂公毛髮動英姿颯爽來酣戰先帝天馬玉花驄畫
工如山兒不同是日牽來赤墀下迴立閭闔生長風
詔謂將軍拂絹素意匠慘淡經營中斯須九重眞龍
出一洗萬古凡馬空玉花却在御榻上榻上庭前屹
相向至尊含笑催賜金圍人太僕皆惆悵弟子韓幹
早入室亦能畫馬窮殊相幹唯畫肉不畫骨忍使驂
騮氣凋喪將軍畫盡善蓋有神必逢佳士亦寫眞即今

飄泊干戈際屢見尋常行路人途窮返遭俗眼白世
上未有如公貧但看古來盛名下終日坎壈纏其身

桃竹杖引

贈章留後

江心蟠石生桃竹蒼波噴浸尺度足斬根削皮如紫
玉江妃水仙惜不得梓潼使君開一束滿堂賓客皆
嘆息憐我老病贈兩莖出入爪甲鏗有聲老夫復欲
東南征乘濤鼓枻白帝城路幽必爲鬼神奪拔劍或
與蛟龍爭重爲告曰杖兮杖兮爾之生也甚正直慎
勿見水踴躍學變化爲龍使我不得爾之扶持滅跡
於君山湖上之青峯噫風塵頽洞兮豺虎咬人忽失

雙杖兮吾將曷從

寄題江外草堂

梓州作寄
成都故居

我生性放誕難欲逃自然嗜酒愛風一作脩竹卜居必林
泉遭亂到蜀江卧病遣所便誅茅初一畝廣地方連
延經營上元始斷手寶應年敢謀土木麗自覺面勢
堅臺庭隨高下敞豁當清川雖有會心侶數能同釣
舡干戈未偃息安得酣歌眠蛟龍無定窟黃鵠摩蒼
天古來達士志一云賢達士寧受外物牽顧惟魯鈍姿豈識
悔吝先偶携老妻去慘淡凌風煙事迹無固必幽貞
愧雙全尚念四小松蔓草易拘纏霜骨不甚長永為

杜集四

十五

隣里憐

述古三首

赤驥頓長纓非無萬里姿悲鳴淚至地為問馭者誰
鳳凰從天來何意復高飛竹花不結實念子忍朝飢
古時君臣合可以物理推賢人識定分進退固其宜

市人日中集於利競錐刀置膏烈火上哀哀自煎熬
農人望歲稔相率除蓬蒿所務穀為本邪羸無乃勞
舜舉十六相身尊道何高秦時任商鞅法令如牛毛

漢光得天下祚永固有開豈唯高祖聖功自蕭曹來
經綸中興業何代無長才吾慕寇鄧勲濟時信良哉

耿賈亦宗臣羽翼共徘徊休運終四百圖書在雲臺

杜工部集卷第四

杜工部集卷第五

前劔南節度叅謀宣義郎檢校尚書工部員外郎賜緋魚袋京兆杜甫

古詩五十二首

冬到金華山觀因得故拾遺陳公學堂遺迹一首

陳拾遺故宅一首

謁文公上方一首

奉贈射洪李四丈一首

早發射洪縣南途中作一首

通泉驛南去通泉縣十五里山水作一首

過郭代公故宅一首

杜集五

觀薛稷少保書畫壁一首

通泉縣署屋壁後薛少保畫鶴一首

陪王侍御同登東山最高頂宴姚通泉晚携

酒泛江一首

春日戲題惱郝使君兄一首

天邊行一首

大麥行一首

苦戰行一首

去秋行一首

光祿坂行一首

山寺一首

南池一首

發閩中一首

閩山歌一首

閩水歌一首

三絕句

莫相疑行一首

遭田父泥飲美嚴中丞一首

別唐十五誠因寄禮部賈侍郎一首

枌樹為風雨所拔歎一首

杜集五

二

茅屋為秋風所破歌一首

入奏行一首

大雨一首

揚旗一首

溪漲一首

戲贈友二首

觀打魚歌一首

又觀打魚一首

越王樓謠一首

海棕行一首

姜楚公畫角鷹歌一首

嚴氏溪放歌行一首

相從歌一首

短歌行二首

草堂一首

四松一首

水檻一首

破舡一首

營屋一首

宿青溪驛奉懷張負外十五兄之緒一首

杜集五

屏迹一首

本三首二首在別卷

贈別賀蘭鈺一首

冬到金華山觀因得故拾遺陳公學堂遺迹

涪石衆山內金華紫崔嵬上有蔚藍天垂光抱瓊臺
繫舟接絕壁杖策窮紫回四顧俯層巔淡然川谷開
雪嶺日色死霜鴻有餘哀焚香玉女跪霧裏仙人來
陳公讀書堂石柱仄青苔悲風爲我起激烈傷雄才

陳拾遺故宅

拾遺平昔居大屋尚脩椽悠揚荒山日慘淡故園煙
位下曷足傷所貴者聖賢有才繼騷雅哲匠不比肩

公生楊馬後名與日月懸同遊英俊人多乘輔佐權
彥昭趙超一云王價郭振起通泉到今素壁滑灑翰銀鈞
連盛事會一時此堂豈千年終古立忠義感遇有遺篇

謁文公上方

野寺隱喬木山僧高下居石門日色異絳氣橫扶踈
窈窕入風磴長蘿紛卷舒庭前猛虎卧遂得文公廬
俯視萬家邑煙塵對階除吾師雨花外不下十年餘
長者自布金禪龕只晏如大珠脫玷豎白月當空虛
甫也南北人蕪漫少耘鋤久遭詩酒污何事忝簪裾
王侯與螻蟻同盡隨丘墟願聞第一義迴向心地初

杜集五

四

金篦刮眼膜價重百車渠無生有汲引茲理儻吹噓

奉贈射洪李四丈

丈人屋上烏人好烏亦好人生意氣豁不在相逢早
南京亂初定所向邑枯槁遊子無根株茅齋付秋草
東征下月峽挂席窮海島萬里須十金妻孥未相保
蒼茫風塵際蹭蹬騏驎老志士懷感傷心骨已傾倒

早發射洪縣南途中作

將老憂貧竄筋力豈能及征途乃一作復侵星得使諸病
入鄙人寡道氣在困無獨立倣裝逐徒旅達曙陵險
遊寒日出霧遲清江轉山急僕夫行不進駑馬若維

繫汀洲稍踈散風景開快悒空慰所尚懷終非曩遊
集衰顏偶一破勝事難屢挹茫然阮籍途更灑楊朱泣
通泉驛南去通泉縣十五里山水作

溪行衣自濕亭午氣始散冬温蚊蚋在人遠鳧鴨亂
登頓生曾陰欹傾出高岸驛樓衰柳側縣郭輕煙畔
一川何綺麗盡日窮壯觀山色遠寂寞江光夕滋漫
傷時愧孔父去國同王粲我生苦飄零所歷有嗟嘆

過郭代公故宅

豪俊初未遇其跡或脫略代公尉通泉放意何自若
及夫登衮冕直氣森噴薄磊落見異人豈伊常情度

杜集五

五

定策神龍後宮中翕清廓俄頃辨尊親指麾存顧託
群公有慙色王室無削弱迴出名臣上丹青照臺閣
我行得遺跡一作址池館皆跡鑿金壯公臨事斷顧步涕
橫落高詠寶劔篇神交付冥寞

觀薛稷少保書畫壁

公詩曰驅車越陝
郊北顧臨大河

少保有古風得之陝郊篇惜哉功名忤但見書畫傳
我遊梓州東遺跡涪江邊畫藏青蓮界書入金榜懸
仰看垂露姿不崩亦不騫鬱鬱三大字蛟龍岌相纏
又揮西方變發地扶屋椽慘澹壁飛動到今色未填
此行疊壯觀郭薛俱才賢不知百載後誰復來通泉

通泉縣署屋壁後薛少保畫鶴

薛公十一鶴皆寫青田真畫色久欲盡蒼然猶出塵
低昂各有意磊落如長人佳此志氣遠豈唯粉墨新
萬里不以力羣遊森會神威遲白鳳態非是蒼鷗隣
高堂未傾覆幸得慰佳賓曝露牆壁外終嗟風雨頻
赤霄有真骨恥飲滂池津冥冥任所往脫略誰能馴

陪王侍御同登東山最高頂宴姚通泉晚携酒泛江

姚公美政誰與儔不減昔時陳太丘邑中上客有柱
史多暇日陪驄馬遊東山高頂羅珍羞下顧城郭銷
我憂清江白日落欲盡復携美人登綵舟笛聲憤怒

杜集五

六

哀中流妙舞逶迤夜未休燈前往往大魚出聽曲低
昂如有求三更風起寒浪涌取樂喧呼覺舡重滿空
星河光破碎四座賓客色不動請公臨深莫相違迴
舡罷酒上馬歸人生歡會豈有極無使霜過一作露露人衣
春日戲題惱郝使君兄

使君意氣凌青霄憶昨懽娛常見招細馬時鳴金騾
裹佳人屢出董嬌饒東流江水西飛鷺可惜春光不
相見願携王趙兩紅顏再騁肌膚如素練通泉百里
近梓州請公一來開我愁舞處重看花滿面樽前還
有錦纏頭

天邊行

天邊老人歸未得日暮東臨大江哭隴右河源不種
田胡騎羌兵入巴蜀洪濤滔天風拔木前飛秃鶩後
鴻鵠九度附書向洛陽十年骨肉無消息

大麥行

大麥乾枯小麥黃婦女行泣夫走藏東至集壁西梁
洋問誰甞鎌胡與羌豈無蜀兵三千人一云千人去部領辛苦
江山長安得如鳥有羽翅託身白雲還故鄉

苦戰行

苦戰身死馬將軍自云伏波之子孫干戈未定失壯

杜集五

七

士使我嘆恨傷精魂去年江南討狂賊臨江把臂難
再得別時孤雲今不飛時獨看雲淚橫臆

去秋行

去秋涪江木落時臂槍走馬誰家兒到今不知白骨
處部曲有去皆無歸遂州城中漢節在遂州城外巴
人稀戰場冤魂每夜哭空令野營猛士悲

光祿坂行

山行落日下絕壁西望千山萬山一作水赤樹枝有鳥亂
鳴一作棲時暝色無人獨歸客馬驚不憂深谷墜草動
只怕長弓射安得更似開元中道路即今多擁隔日白

賊多翻是
長弓子弟

山寺

得開字章
留後同遊

野寺根石壁諸龕遍崔嵬前佛不復辨百身一莓苔
雖有古殿存世尊亦塵埃如聞龍象泣足令信者哀
使君騎紫馬捧擁從西來樹羽靜千里臨江夕徘徊山
僧衣藍縷告訴棟梁摧公爲顧賓徒咄嗟檀施開吾
知多羅樹却倚蓮華臺諸天必歡喜鬼物無嫌猜以
茲撫士卒孰曰非周才窮子失淨處高人憂禍胎歲
晏風破肉荒林寒可迴思量入道苦自哂同嬰孩

南池

杜集五

崢嶸巴閬間所向盡山谷安知有蒼池萬頃浸坤軸
呀然閬城南枕一作控帶巴江腹芰荷入異縣稷稻共比屋
皇天不無意美利戒止足高田失西成此物頗豐熟
清源多衆魚遠岸富喬木獨嘆楓香林春時好顏色
南有漢王祠終朝走巫祝歌舞散靈衣荒哉舊風俗
高堂亦明王魂魄猶正直不應空陂上縹緲親酒食
淫祀自古昔非唯一川瀆干戈浩茫茫地僻傷極目
平生江海興遭亂身局促駐馬問漁舟躊躇慰羈束

發閬中

前有毒蛇後猛虎溪行盡日無村塢江風蕭蕭雲拂

地山木慘慘天欲雨女病妻憂歸意速秋花錦石誰
復數別家三月一得書避地何時免愁苦

閬山歌

閬州城東靈山白閬州城北玉臺碧松浮欲盡不盡
雲江動將崩已一作未崩石那知根無鬼神會已覺氣與
嵩華敵中原格鬪且未歸應結茅齋看青壁

閬水歌

嘉陵江色何所似石黛碧玉相因依正憐日破浪花
出更復春從沙際歸巴童蕩槳歌側過水鷄銜魚來
去飛閬中勝事可腸斷閬州城南天下稀

杜集五

九

三絕句

前年渝州殺刺史今年開州殺刺史羣盜相隨劇虎
狼食人更肯留妻子

二十一家同入蜀唯殘一人出駱谷自說二女齧臂
時迴頭却向秦雲哭

殿前兵馬雖驍雄縱暴略與羌渾同聞道殺人漢水
上婦女多在官軍中

莫相疑行

男兒生無所成頭皓白牙齒欲落真可惜憶獻三賦
蓬萊宮自怪一日聲輝赫集賢學士如堵牆觀我落

筆中書堂往時文彩動人主此日飢寒趨路傍晚將
末契託年少當面輸一作論心背面笑寄謝悠悠世上
兒不爭好惡莫相疑

遭田父泥飲美嚴中丞

步屣隨春風村村自花柳田翁逼社日邀我嘗春酒
酒酣誇新尹畜眼未見有迴頭指大男渠是弓弩手
名在飛騎籍長畚歲時夕前日放營農辛苦救衰朽
差科死則已誓不舉家走今年大作社拾遺能住否
叫婦開大瓶盆中為吾取感此氣揚揚須知風化首
語多雖雜亂說尹終在口朝來偶然出自外將及酉

杜集五

十

夕客惜人情如何拒鄰叟高聲索果栗欲起時被肘
指揮過無禮未覺村野醜月出遮我留仍嗔問升斗
別唐十五誠因寄禮部賈侍郎

九載一相逢百年能幾何復為萬里別送子山之阿
白鶴久同林潛魚本同河未知棲集期衰老強高歌
歌罷兩悽惻六龍忽蹉跎相視髮皓白况難駐羲和
胡星墜燕地漢將仍橫戈蕭條四海內人少豺虎多
少人慎莫投多虎信所過飢有易子食獸猶畏虞羅
子負經濟才天門鬱嵯峨飄飄適東周來往若崩波
南宮吾故人白馬金盤陀雄筆映千古見賢心靡他

念子善師事歲寒守舊柯為吾謝賈公病肺卧江池
枿樹為風雨所拔歎

倚江枿樹草堂前故老相傳二百年誅茅卜居揔為
此五月髣髴聞寒蟬東南飄風動地至江翻石走流
雲氣幹排雷雨猶力爭根斷泉源豈天意滄波老樹
性所愛浦上童童一青蓋野客頻留懼雪霜行人不
過聽竽籟虎倒龍顛委榛棘淚痕血點垂胷臆我有
新詩何處吟草堂自此無顏色

茅屋為秋風所破歌

八月秋高風怒號卷我屋上三重茅茅飛度江洒一作滿

杜集五

十一

江郊高者挂冑長林稍下者飄轉沉塘坳南村群童
欺我老無力忍能對面為盜賊公然抱茅入竹去脣焦
口燥呼不得歸來倚杖自嘆息俄頃風定雲墨色秋
天漠漠向昏黑布衾多年冷似鐵嬌兒惡卧踏裏裂
床床屋漏無乾處雨脚如麻未斷絕自經喪亂少睡
眠長夜沾濕何由徹安得廣廈千萬間大庇天下寒
士俱歡顏風雨不動安如山嗚呼何時眼前突兀見
此屋吾廬獨破受凍死亦足

入奏行

贈西山檢察使竇侍御

竇侍御驥之子鳳之鷄年未三十忠義俱骨鯁絕代

無炯如一段清冰出萬壑置在迎風寒露路之玉壺蔗
漿歸厨金盃凍洗滌煩熱足以寧君軀政一作整用踈通合
典則戚聯豪貴耽文儒兵革未息人未蘇天子亦念
西南隅吐蕃憑陵氣頗麤竇氏檢察應時須運糧繩
橋壯士喜斬木火井窮猿呼八州刺史思一戰三城
守邊却可圖此行入奏計未小密奉聖旨恩宜殊繡
衣春當霄漢立綵服日向庭闈趨省郎京尹必俯拾
江花未落還成都江花未落還成都肯訪浣花老翁
無一云公來肯為君酤酒滿眼酤與奴白飯馬青芻

一云携酒肯訪浣花老為君著衫將鬍鬚

杜集五

十一

大雨

西蜀冬不雪春農尚嗷嗷上天迴哀眷朱一作清夏雲鬱
陶執熱乃沸鼎纖絺成緼袍風雷颯萬里霈澤施蓬
蒿敢辭茅葦漏已喜黍豆高三日無行人二一作大江聲
怒號洑惡邑里清矧茲遠江臯荒廷步鶴鶴隱几望
波濤沉疴聚藥餌頓忘所進勞則知潤物功可以貸不
毛陰色靜壠畝勸耕自官曹四隣耒耜出何必吾家操
揚旗二年夏六月成都尹鄭公置酒公堂觀騎士試新旗幟
江一作風雨颯長夏府中有餘清我公會賓客肅肅有異
聲初筵閱軍裝羅列照廣庭庭空六一作四馬入駝駝揚

旗旌迴迴偃飛蓋熠熠迸流星來纏一作衝風颭急去擘
山岳傾材歸俯身盡妙取略地平虹霓就掌握舒卷
隨人輕三州陷犬戎但見西嶺青公來練猛士欲奪
天邊城此堂不易升庸蜀日已寧吾徒且加飡休適
蠻與荆

溪漲

當時浣花橋溪水纔尺餘白石一作日明可把水中有行
車秋夏忽汎溢豈唯入吾廬蛟龍亦狼狽況是鼈與
魚茲晨已半落歸路跬步踈馬嘶未敢動前有深填
淤青青屋東麻散亂牀上書不意遠山雨夜來復何

杜集五

十三

如我遊都市間晚憩必村墟乃知久行客終日思其居

戲贈友二首

元年建巳月郎有焦校書自誇足膂力能騎生馬駒
一朝被馬踏脣裂板齒無壯心不肯已欲得東擒胡
元年建巳月官有王司直馬驚折左臂骨折面如墨
駑駘漫深泥何不避雨色勸君休歎恨未必不為福

觀打魚歌

綿州江水之東津魴魚鱖魚色勝銀漁人漾舟沉大
網截江一擁數百鱗衆魚常才盡却弃赤鯉騰出如
有神潛龍無聲老蛟怒迴風颯颯吹沙塵甕養子左右

揮霜刀鱠飛金盤白雪高
徐州秃尾不足憶漢陰槎
頭遠遁逃魴魚肥美知第一
既飽驩娛亦蕭瑟君不見
朝來割素鬢咫尺波濤永相失

又觀打魚

蒼江漁子清晨集設網提綱萬一作取魚急能者操舟
疾若風撐突波濤挺义入小魚脫漏不可紀半死半
生猶戢戢大魚傷損皆垂頭屈強泥沙有時立東津
觀魚已再來主人罷鱠還傾盃日暮蛟龍改窟穴山
根鱣鮪隨雲雷干戈兵革鬪未止一云干戈格鬪尚未已鳳皇麒麟
安在哉吾徒胡為縱此樂暴殄天物聖所哀

杜集五

十四

越王樓歌

綿州州府何磊落顯慶年中越王作孤城西北起高
樓碧瓦朱甍照城郭樓下長江百丈清山頭落日半
輪明君王舊跡今人賞轉見千秋萬古情

海棕行

左綿公館清江濱海棕一株高入雲龍鱗犀甲相錯
落蒼稜白皮十抱文自是衆木亂紛紛海棕焉知身
出群移栽北辰不可得時有西域胡僧識

姜楚公畫角鷹歌

楚公畫鷹鷹戴角殺氣森森如一云到幽朔觀者貪愁

掣臂飛畫師不是無心學此鷹寫真在左綿却嗟真
骨遂虛傳梁間鷲雀休驚怕亦未搏空上九天

嚴氏溪放歌行

天下甲馬未盡銷豈免溝壑常漂漂劔南歲月不可
度邊頭公卿仍獨驕費心姑息是一役肥肉大酒徒
相要嗚呼古人已糞土獨覺志士甘漁樵況我飄轉
無定所終日慊慊忍羈旅秋宿霜溪素月高喜得與
子長夜語東遊西還力實倦從此將身更何許知子
松根長茯苓遲暮有意來同煮

相從歌

贈嚴二別駕

杜集五

十五

我行入東川十步一迴首成都亂罷氣蕭瑟浣花草
堂亦何有梓中豪俊大者誰本州從事知名久把臂
開樽飲我酒酒酣擊劔蛟龍吼烏帽拂塵青螺粟紫
衣將炙緋衣走銅盤燒臘光一作炎吐日夜如何其初促
膝黃昏始扣主人門誰謂俄頃膠在漆萬事盡付形
骸外百年未見歡娛畢神傾意豁真佳士夕客多憂
今愈疾高視乾坤又可愁一軀交態同悠悠垂老遇
君未恨晚似君須向古人求

短歌行

贈王郎司直

王郎酒酣拔劔斫地歌莫哀我能拔爾抑塞磊落之

竒才豫樟翻風白日動鯨魚跋浪滄溟開且脫佩劍
休徘徊西得諸侯棹錦水欲向何門颯珠履仲宣樓
頭春已深青眼高歌望吾子眼中之人吾老矣

短歌行

送祁錄事歸合州因寄蘇使君

前者途中一相見人事經年記君面後生相動一作勸
何寂寥君有長才不貧賤君今起施春江流余亦沙
邊具小舟幸為達書賢府主江花未盡會江樓

草堂

昔我去草堂蠻夷塞成都今我歸草堂成都適無虞
請陳初亂時反覆乃須臾大將赴朝廷羣小起異圖

杜集五

六

中宵斬白馬盟歆氣已麤麤西取邛南兵北斷劔閣隅
布衣數十人亦擁專城居即楊子琳栢正節之徒其勢不兩大始

聞蕃漢殊西卒却倒戈賊臣互相誅焉知肘腋禍自
及梟鏡徒義士皆痛憤紀綱亂相踰一國實三公萬
人欲為魚唱和作威福孰肯辨無辜眼前列杻械背
後吹笙竽談笑行殺戮濺血滿長衢到今用鉞地風
雨聞號呼鬼一作人妾與鬼馬色悲充爾娛國家法令在

此又足驚吁賤子且奔走三年望東吳弧矢暗江海
難為遊五湖不忍竟舍此復來薤榛蕪入門四松在
步堞萬竹踈舊犬喜我歸低徊入衣裾隣舍喜我歸

沽酒携胡蘆一云提榼壺大官喜我來遣騎問所須城郭
喜我來賓客隘村墟天下尚未寧健兒勝腐儒飄飄
風塵際何地置老夫於時見疣贅骨髓幸未枯飲啄
媿殘生食薇不敢餘

四松

四松初移時大抵三尺強別來忽三歲離立如人長
會看根不拔莫計枝凋傷幽色幸秀發踈柯亦昂藏
所插小藩籬本亦有隄防終然振撥損得恹千葉黃
敢為故林主黎庶猶未康避賊今始歸春草滿空堂
覽物嘆衰謝及茲慰淒涼清風為我起洒面若微霜
本集卷五 七

足以送老姿

一作足為送老資

聊待偃蓋張我生無根蒂配爾

亦茫茫有情且賦詩事迹可兩忘勿矜千載後慘澹
蟠穹蒼

水檻

蒼江多風颺雲雨晝夜飛茅軒駕巨浪焉得不低垂
遊子久在外門戶無人持高岸尚為谷何傷浮柱欹
扶顛有勸誠恐貽識者嗤既殊大厦傾可以一木支臨
川視萬里何必攔檻為人生感故物慷慨有餘悲

破舡

平生江海心宿昔具扁舟豈唯青谿上日傍柴門遊

蒼惶避亂兵，緬邈懷舊丘。隣人亦已非，野竹獨脩脩。
舡舡不重扣，埋沒已經秋。仰看西飛翼，下媿東逝流。
故者或可掘，新者亦易求。所悲數奔竄，白屋難久留。

營屋

我有陰江竹，能令朱夏寒。陰通積水內，高入浮雲端。
甚疑鬼物憑，不顧剪伐殘。東偏若面勢，戶牖永可安。
愛惜已六載，茲晨去千竿。蕭蕭見白日，洶洶開奔湍。
度堂匪華麗，養拙異考槃。草茅雖薙葺，衰疾方少寬。
洗然順所適，此足代加餐。寂無斤斧響，庶遂憩息懽。
宿青溪驛，奉懷張負外十五兄之緒。

杜集五

六

漾舟千山內，日入泊枉渚。我生本飄飄，今復在何許。
石根青楓林，猿鳥聚儔侶。月明遊子靜，畏虎不得語。
中夜懷友朋，乾坤此深阻。浩蕩前後間，佳期付荆楚。

屏迹

衰年一作顏甘屏迹，幽事供高卧。鳥下竹根行，龜開萍

葉過。年荒酒價乏，日併園蔬課。猶酌甘泉歌。一云獨酌

歌酣且歌長擊樽破

贈別賀蘭鈺

黃雀飽野粟，群飛動荆榛。今君抱何恨，寂寞向時人。
老驥倦驥首，蒼鷹愁易馴。高賢世未識，固合嬰飢貧。

國步初返正乾坤尚風塵悲歌鬢髮白遠赴湘吳春
我戀岷下芋君思千里蓴生離與死別自古鼻酸辛

杜工部集卷第五

